



## Sklad u svemiru ostvaruje se činjenjem dobra i ostavljanjem zabranjenog (Medina)

Hatib: dr. Ali ibn Abdurrahamn el-Huzejfi

28. muharemu 1444. po Hidžri / 26. august 2022.

Hvala Allahu, Gospodaru Zemlje i nebesa, Najuzvišenijem, Koji je naredio činjenje pobožnih djela, u kojima je svako dobro i blagoslov, a zabranio činjenje harama, u kojima je svako prokletstvo, zlo i propast. Hvalim svoga Gospodara i zahvaljujem Mu na blagodatima koje ne može izbrojati niko osim Njega, na onima za koje znamo i koje ne znamo. Svjedočim da nema boga osim Allaha, jedinog, Koji nema druga, Koji se izdvaja Svojim lijepim imenima i savršenim svojstvima, i svjedočim da je naš vjerovjesnik i prvak Muhammed, sallallahu alejhi ve sellem, Njegov rob i poslanik, najbolje stvorenje, potpomognut od Allaha, mudžizama – nadnaravnim djelima. Allahu moj, smiluj se, spasi i blagoslovi Svoga roba i poslanika Muhammeda, sallallahu alejhi ve sellem, i njegovu porodicu i ashabe koji su pretekli druge ljude u dobru. Bojte se Allaha tako što ćete Mu se približiti onim čime je On zadovoljan, i ostaviti ono što Ga srdi i uznemirava. Kako je samo lijepa završnica bogobojažnih, a kako je loš završetak grešnika i onih koji nered čine. Budite od onih koji slijede put spasa, a ne budite od onih koji slijede put grijeha i nepokornosti.

Uzvišeni kaže: "Oni koji su poslušni Allahu i Poslaniku bit će u društvu vjerovjesnika, i pravednika, i šehida, i dobrih ljudi, kojima je Allah milost Svoju darovao. A kako će oni divni drugovi biti! Ta blagodat će od Allaha biti, a dovoljno je to što Allah sve zna." (En-Nisa, 69–70)

"A onoga koji Allahu i Poslaniku Njegovu ne bude poslušan sigurno čeka vatra džehennemska; u njoj će vječno i zauvijek ostati." (El-Džinn, 23)

O muslimani, Allah, džellešanuhu, stvorio je kosmos sa svim onim što je potrebno Njegovim stvorenjima, od opskrbe, stvari, oruđa, ukrasa, imetka, životinja i svega





ostalog, i potčinio ga je, u cijelosti, interesima i koristima čovjeka i njegovoj egzistenciji do određenog roka, koji on nikako ne može prekoračiti.

Uzvišeni kaže: "On vam je Zemlju pogodnom učinio, pa hodajte predjelima njezinim i hranite se onim što On daje, Njemu ćete poslije oživljenja odgovarati." (El-Mulk, 15)

"Mi smo nebesa i Zemlju i ono što je između njih mudro stvorili i do roka određenog, ali nevjernici okreću glave od onoga čime im se prijeti." (El-Ahkaf, 3)

"I stoku On za vas stvara; njome se od hladnoće štitite, a i drugih koristi imate, njome se najviše i hranite; ona vam je ukras kad je sa ispaše vraćate i kad je na pašu izgonite, a nosi vam i terete u mjesta u koja bez velike muke ne biste stigli – Gospodar vaš je, uistinu, blag i milostiv – i konje, i mazge, i magarce – da ih jašete, i kao ukras - a stvoriće i ono što ne znate." (En-Nahl, 5–8)

"I daje vam da se koristite onim što je na nebesima i onim što je na Zemlji, sve je od Njega. To su, zaista, pouke za ljude koji razmišljaju." (El-Džasije, 13)

"Allah za vas stvara žene od vaše vrste, a od žena vaših daje vam sinove i unuke, i ukusna jela vam daje. Pa zašto u laž oni vjeruju, a Allahove blagodati poriču." (En-Nahl, 72)

"I ako biste Allahove blagodati brojali, ne biste ih nabrojali – čovjek je, uistinu, nepravedan i nezahvalan." (Ibrahim, 34)

S obzirom na to da je Allah, džellešānuhu, stvorio ovaj kosmos, u svoj njegovoj potpunosti i ljepoti, i sa svim onim što je potrebno za život, za svako biće na Zemlji, i sa mnogim raznovrsnim korisnim stvarima i svim uzrocima koji su potrebni za opstanak života na njemu i njegovo unapređenje, On nas je, također, obavijestio da nije stvorio kosmos bez svrhe i smisla i nije ga prepustio slučajnosti.

Uzvišeni kaže: "Mi nismo stvorili nebo i Zemlju, i ono što je između njih, da se zabavljamo. Da smo se htjeli zabavljati, zabavljali bismo se onako kako Nama dolikuje, ali Mi to ne činimo, Nego istinom suzbijamo laž, istina je uguši i laži nestane; a teško vama zbog onoga što o Njemu iznosite!" (El-Enbija, 16–18)





“Mi smo sedam nebesa iznad vas stvorili, i Mi bdijemo nad onim što smo stvorili.”  
(El-Mu'minun, 17)

“Mi nismo uzalud stvorili nebo i Zemlju i ono što je između njih; tako misle nevjernici, pa teško nevjernicima kad budu u Vatri!” (Sad, 27)

“Zar ste mislili da smo vas uzalud stvorili i da Nam se nećete povratiti?” I neka je uzvišen Allah, Vladar istiniti, nema drugog boga osim Njega, Gospodara svemira veličanstvenog!” (El-Mu'minun, 115–116)

“Allah je nebesa, vidite ih, bez stubova podigao, i onda svemirom zavladao, i Sunce i Mjesec potčinio, svako se kreće do roka određenog; On upravlja svim i potanko izlaže dokaze da biste se uvjerali da ćete pred Gospodara svoga stati.” (Er-Ra'd, 2)

“Na Zemlji nema nijednog živog bića a da ga Allah ne hrani. On zna gdje će koje boraviti i gdje će sahranjeno biti. Sve to ima u jasnoj Knjizi.” (Hud, 6)

“A nevjernici govore: ‘Čas oživljenja nam neće doći!’ Reci: ‘Hoće, tako mi Gospodara moga, Koji zna i ono što je skriveno, zacijelo će vam doći.’ Njemu ne može ništa, ni trunčica jedna ni na nebesima ni na Zemlji, izmaći, i ne postoji ništa, ni manje ni veće od toga, što nije u jasnoj Knjizi.” (Saba, 3)

“Sve što je živo umire Allahovom voljom u času suđenom.” (Ali Imran, 145)

Allah, džellešanuhu, nije prepustio stvaranje nekome drugom, nego je On stvorio ovaj kosmos da svjedoči veliku istinu, a ona je tevhid – Njegova jednoća i pokornost Njemu, a sve to u službi dobra i dobrote na Zemlji.

Uzvišeni kaže: “O ljudi, klanjajte se Gospodaru svome, Koji je stvorio vas i one prije vas, da biste se kazne sačuvali; koji vam je Zemlju učinio posteljom, a nebo zdanjem; Koji s neba spušta kišu i čini da s njom rastu plodovi, hrana za vas. Zato ne činite svjesno druge Allahu ravnim!” (El-Bekara, 21–22)

“Džine i ljude stvorio sam samo zato da Mi se klanjaju, Ja ne tražim od njih opskrbu niti želim da Me hrane.” (Ez-Zarijat, 56–58)





Allah, džellešanuhu, poslao je poslanike, a posljednji kojeg je poslao je naš prvak Muhammed, sallallahu alejhi ve sellem, kako bi na Zemlji uspostavili red činjenjem dobrih djela, i kako bi je očistili od paganstva i svake vrste zla.

Uzvišeni kaže: "Mi smo svakom narodu poslanika poslali: 'Allahu se klanjajte, a kumira se klonite!'" (En-Nahl, 36)

"I ne pravite nered na Zemlji, kad je na njoj red uspostavljen." (El-A'raf, 56). tj. nakon što su poslanici na njoj uspostavili red, primjenjujući ono što im je objavljeno u knjigama. Allah, džellešanuhu, naredio je Svojim poslanicima da uživaju u lijepim stvarima koje je On dozvolio i da ustrajavaju u činjenju dobrih djela, bez kojih nije moguće uspostaviti red na Zemlji.

Uzvišeni kaže: "O poslanici, dozvoljenim i lijepim jelima se hranite i dobra djela činite, jer Ja dobro znam što vi radite!" (El-Mu'minun, 51)

Sljedbenici Allahovih poslanika su vjernici, kojima je naređeno da slijede njihov put, u riječima Uzvišenog: "O vjernici, jedite ukusna djela koja smo vam podarili i budite Allahu zahvalni, ta vi se samo Njemu klanjate!" (El-Bekara, 172)

"Reci: 'Ko je zabranio Allahove ukrase, koje je On za robove Svoje stvorio, i ukusna jela?' Reci: 'Ona su za vjernike na ovome svijetu, a na onome svijetu su samo za njih.'" (El-A'raf, 32)

Prema tome, Allahovi poslanici i njihovi sljedbenici vjernici shvatili su ovaj kosmos kao prostor i vrijeme za činjenje dobrih djela i uspostavljanje reda na njemu, pa su postigli svako dobro, džennetske vrtove i dobra djela od kojih korist imaju oni sami ali i sva ostala stvorenja, izvršavajući temeljne islamske dužnosti i ostala prateća dobra djela.

Brate i sestro u islamu, nemojte potcijeniti nijedno dobro djelo, jer ne znate koje djelo će va uvesti u Džennet i spasiti od Vatre. Džabir, radijallahu anhu, prenosi da je Vjerovjesnik, sallallahu alejhi ve sellem, rekao: "Ne potcjenjuj nijedno dobro djelo, a dobro djelo je i to da svoga brata sretnoš nasmijana i vedra lica." (Buhari i Muslim) Ebu Hurejra, radijallahu anhu, prenosi da je Vjerovjesnik, sallallahu alejhi ve sellem,





rekao: "Dok je neki čovjek išao putem, naišao je na granu trnja, pa ju je sklonio s puta, i Allah mu je zahvalio na tome i oprostio mu." (Buhari i Muslim)

Ebu Hurejra, radijallahu anhu, prenosi da je žena prostitutka vidjela psa kako kruži oko bunara, isplaženog jezika od žeđi, pa je skinula svoju cipelu, u nju zagrabila vode i napojila ga, pa joj je Allah oprostio."

Uzvišeni kaže: "Allah neće nikome ni trunku nepravde učiniti. Dobro djelo On će umnogostručiti i još od Sebe nagradu veliku dati." (En-Nisa, 40)

Dakle, za vjernike je ovaj kosmos prostor i vrijeme za činjenje dobrih djela, dok je za one koji ne vjeruju u Allaha i Sudnji dan on prostor za zadovoljavanje zabranjenih prohtjeva, prolazne užitke i činjenje loših djela, a najgore loše djelo je širk koji se ogleda u tome da čovjek uzme sebi stvorenje za boga, moli mu se, nada se od njega, oslanja se na njega, od njega traži pomoć, njemu usmjerava svoje želje i potrebe, od njega očekuje opskrbu i pomoć, njemu se moli za otklanjanje nedaća i teškoća, to je širk koji Allah Uzvišeni neće oprostiti osim onome ko se pokaje.

Uzvišeni kaže: "Allah, sigurno, neće oprostiti da Njemu druge smatraju ravnim, a oprostiti će kome hoće ono što je manje od toga. A daleko je zalutao onaj ko smatra da je Allahu neko ravan." (En-Nisa, 116)

"Ko drugog Allahu smatra ravnim, Allah će mu ulazak u Džennet zabraniti i boravište njegovo će Džehennem biti; a nevjernicima neće niko pomoći." (El-Maida, 72)

Ebu Derda, radijallahu anhu, prenosi da je Poslanik, sallallahu alejhi ve sellem, rekao: "Allah, džellešanuhu, rekao je: 'Zaista je čudno stanje ljudi i džina: Ja ih stvaram, a oni obožavaju nekog drugog. Ja im opskrbu dajem, a oni zahvaljuju nekom drugom. Moje dobro spušta se robovima, a od njih se Meni uzdiže njihovo zlo. Ja im se umiljavam blagodatima, a oni se omražavaju kod Mene činjenjem grijeha.'" (Taberani, Musneduš-Šamijin, Hakim, Tarih, Bejheki, Šuab)

Poslije širka, po težini, dolaze veliki grijesi, ovisno o štetnosti svakog pojedinačnog grijeha. Svaki grijeh kojim čovjek učini nepravdu sebi, između njega i Allaha, i pokaje







se, Allah će mu ga oprostiti, ali ako učini nepravdu nekome drugome, Allah mu neće oprostiti taj grijeh dok obespravljenom ne vrati njegovo pravo, u danu u kojem neće koristiti ni dinari ni dirhemi, nego će se obespravljenom dati dio dobrih djela onoga ko mu je nepravdu učinio, i kada nestane dobrih djela, uzet će se loša djela obespravljenog i prebaciti na onoga ko mu je nepravdu učinio, a onda će on biti bačen u Vatru.

Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Ko učini nepravdu svome bratu, u pogledu časti ili nečega drugog, neka od njega traži oprosta danas prije nego što dođe dan kada neće biti dinara ni dirhema. Ako bude imao dobrih djela, bit će mu uzeto onoliko koliko je teška nepravda koju je učinio, a ako ne bude imao dobrih djela, uzet će se od loših djela onoga kome je nepravdu učinio, i prebacit će se njemu." (Muslim, Tirmizi)

Ebu Hurejra, radijallahu anhu, prenosi da je Vjerovjesnik, sallallahu alejhi ve sellem, rekao: "Na Sudnjem danu svakom će biti nadoknađeno njegovo, pravo pa će čak i šukavoj ovci biti nadoknađeno od rogate ovce koja ju je ubola." (Muslim)

Kada bi iko mogao izbjeći namirivanje prava, zbog učinjene nepravde, sigurno bi to bili čestiti vjernici, ali čak ni oni to neće moći izbjeći. Ebu Seid el-Hudri, radijallahu anhu, prenosi da je Vjerovjesnik, sallallahu alejhi ve sellem, rekao: "Vjernici će se spasiti Vatre, nakon što prijeđu sirat-čupriju, pa će biti zadržani na mostu, između Dženneta i Vatre, i bit će namirene nepravde koje su činili jedni drugima na dunjaluku, pa kada budu očišćeni, bit će im dozvoljeno da uđu u Džennet. Tako mi Onoga u Čijoj je ruci moja duša, svaki od njih poznavat će svoju kuću u Džennetu bolje nego što je poznavao svoju kuću na dunjaluku." (Buhari)

Poštovani vjernici, čuvajte se grijeha, makar oni izgledali mali u tvojim očima, jer za svaki grijeh neko će se žaliti na tebe Allahu. Ibn Omer, radijallahu anhu, prenosi da je Vjerovjesnik, sallallahu alejhi ve sellem, rekao: "Žena je ušla u Džehennem zbog mačke koju je svezala, nije je hranila niti ju je pustila da se sama hrani zemaljskim plodovima." (Buhari i Muslim)





Allahov Poslanik, sallallahu alejhi ve sellem, rekao je: "Čuvajte se potcjenjujućih grijeha, onih koji su mali u vašim očima, jer se oni skupljaju kod čovjeka dok ga ne unište."

Uzvišeni kaže: "Reci: 'O robovi Moji koji ste se prema sebi ogriješili, ne gubite nadu u Allahovu milost! Allah će, sigurno, sve grijeha oprostiti; On, doista, mnogo prašta i On je milostiv.' I povratite se Gospodaru svome i pokorite Mu se prije nego što vam kazna dođe – poslije vam niko neće u pomoć priskočiti. I slijedite ono najljepše, ono što vam Gospodar vaš objavljuje, prije nego što vam iznenada kazna dođe, za čiji dolazak nećete znati." (Ez-Zumer, 53–55)

O muslimani, jedna od stvari koja iskupljuje grijeha, uvećava i čisti dobra djela, popravljajući nedostatke u pobožnim djelima i tjera šejtane jeste spominjanje Allaha u svim situacijama.

Uzvišeni kaže: "O vjernici, često Allaha spominjite i hvalite, i ujutro i navečer Ga veličajte." (El-Ahzab, 41–42)

O vjernici, "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!" (El-Ahzab, 56)

